

Allannguutissatut siunnersuut

uunga

**Uunga siunnersuut: Aningaasarsianit akileraarutit pillugit Inatsisartut inatsisaata
allanngortinnera pillugu Inatsisartut inatsisaat**

Aappassanneerpeqarnissaanut Naalakkersuisunit saqqummiunneqartoq

§ 1-imut

1. Nr. 6-imi § 86 a-mi nutaami siunnersuutigineqartumi imm. 3-tut nutaatut ilanngunneqarpoq:
”Imm. 3. Imm. 1 aamma 2 malillugit aningaasaatini piginneqataassutitut pisinermut akigititap
naatsorsorneqarnerani aningaasaatini piginneqataassutitut pisinermut akigititaq,
atorunnaarsitsinissaq pillugu ataatsimeersuarnermi aalajangiinerup tamanut
saqqummiunneqarneranut ulloq, imaluunniit tamatumunnga paasissutissanik allassimasoqarani
pisoqartillugu, ingerlatseqatigiiffik atorunnaarsinneqalersoq imaluunniit atuukkunnaarsinneqalersoq
tamanut saqqummiussinermut ulloq, sivikinnerpaamik ukiut 3-t ingerlareersimappata
pissarsiarineqarsimasoq, isiginiarneqassanngilaq.”

§ 2-mut

2. § 2-mi imm. 3-tut nutaatut ilanngunneqarpoq:

”Imm. 3. § 1, nr. 5-ip atuutilerfissaanut ulloq Naalakkersuisut nalunaarummi aalajangersassavaat.”

Siunnersuummut nassuiaatit

Nassuiaatit nalinginnaasut

Suliffeqarfimmik atorunnaarsitsinermi pissarsiat akileraaruserneqartarnerannik atuutilersitsinissaq pillugu siunnersuut avaqqutaarneqarsinnaasoq Naalakkersuisut eqqumaffigilerpaat.

Allannguutissatut siunnersuummi siunertaavoq taamatut aarlerinaateqarnerata annikillisinnissaa.

Tamatuma saniatigut siunnersuutigineqarpoq, pisortanit ikiorsiissutit akileraarutitigut suliarineqartarnerat pillugu inatsimmi § 72 qaqugu atorunnaarsinneqassanersoq piffissap aalajangersarnissaanut Naalakkersuisut piginnaatinneqassasut.

Suliffeqarfimmik atorunnaarsitsinermi pissarsiat akileraaruserneqarnissaasa avaqqutaarneqarnera § 86 a, imm. 1 siunnersuutigineqartoq malillugu suliffeqarfiup atorunnaarsinneqarnerani akileraarutip ilaata, naleqqiussilluni aningaasaatinut piginneqataassutitut pisinermut akianut naapertuuttup, utertinneqarnissaanut akileraartussaataitaasoq piumasaqarsinnaavoq. Taamaaqataanik akileraartussaataitaasoq § 86 a, imm. 2 malillugu ingerlatseqatigiiffimmit nunanit allaneersumit suliffeqarfiup atorunnaarsinneqarnerani pissarsianik tigusaqartoq, aningaasaatinut piginneqataassutitut pisinermut akia aallaavigalugu ilanngaateqartarpoq.

Tamatuma inernerissavaa, akileraartussaataitaasoq iluanaaruteqarsimappat, tassa imaappoq: Suliffeqarfiup atorunnaarsinneqarnerani iluanaarutit, akileraaruteqannginnermi, aningaasaatinut piginneqataassutitut pisinermi akianit, annertunerusimappata, suliffeqarfiup atorunnaarsinneqarnerani pissarsiat aatsaat akileraaruserneqassasut.

Taamaattoq aamma ilanngaatiginninnissaq suliffeqarfiup atorunnaarsinnerani iluanaarutit akileraaruserneqarnissaasa avaqqutaarluinnarnissaanik, taamaalillunilu akileraarutitigut iluaqutissarsitinneqarnissamik, periarfissamik ammaassivoq. Tamanna assersuutigalugu imatut pisinnaavoq:

A-p 2010-mi aktiaatileqatigiiffimmi Kommuneqarfik Sermersuumi angerlarsimaffeqartumi aktiaatit tamaasa 250.000 koruuninik pisinermi akeqartillugit pisiarai. 2024-mi A-p ingerlatseqatigiiffik atorunnaarsinnialerpa, taamaalinerani taamaallaat 1 mio. koruuninik tigoraaannarnik aningaasanik uninngasuuteqarluni. Suliffeqarfiup atorunnaarsinneqarnerani akileraarut (17 pct. 1,0 mio. kr. -nit=) 170.000 koruuniusussaavoq aammalu A-p pisinermut akiata ilanngaatigisussaana pissutigalugu $((250.000 \text{ kr.} / 1 \text{ mio. kr.}) * 170.000 =) 42.500$ koruuninik pissarsinissamut pisinnaatitaasussaalluni. A taamaaliornermini suliffeqarfiup atorunnaarsinnerani akileraarummik katillugu 127.500 koruuninik akiliisussaassaaq.

Kisiannili A-p ingerlatseqatigiiffimmi aktiaatit pisisumut B-mut 1 mio. koruunilerlugit tunniullugit suliffeqarfiup atorunnaarsinnerani akileraaruteqarnissaq pinngitsoorluinnarsinnaavaa. B-p immaqa taamaaqataannik aningaasartalerlugit A-mit taarsigassarsiarisinnaavai. A aktiaatit tuninerannut akileraaruserneqassanngilaq, tassami pisuussutinik tunisinermit iluanaarutit aallaaviatigut inunnut akileraaruteqaataasussaangimmata.

B-p tamatuma kingorna ingerlatseqatigiiffik atorunnaarsissinnaavaa, aammalu 1 mio. koruunit pissarsiaralugit. B-p aktiaatinik pisinerani akigititaaq 1 mio. koruuniummat, B suliffeqarfiup atorunnaarsinnerani akileraarummik akiliissanngilaq. B-p tamatuma kingorna A-mut akiitsuni 1 mio. koruuniusut akilersinnaavai. Akiitsut akilerneqarnerat A-mut akileraaruserneqartussaangilaq, aammalu suliffeqarfiup atorunnaarsinnerani iluanaarutit akileraarusernagit A-mut tunniunneqarnerat taamatut aaqqiinerup kinguneraa.

A imaluunniit B aaqquissuussinermit annaasaqarsinnaanermik nalaataqangillat.

Akileraartarnermut ingerlatsiviup nuussinerit taamaattut, attuumassuteqannginnissamik periutsimut unioqqutitsinerusimangippata, qaangiinnarsinnaanngilai. Tamatuma saniatigut niuernerit taamaattut aktiaatinik pissusiviusuni pisinermit tunisinermillu immikkoortikkuminaassinnaapput.

Avaqqutaarisinnaanermut periarfissap taassuma sumiissusersinissamut periaatsit assigiinngitsut eqqarsaatigineqarsinnaapput. Allanguutissatut siunnersuutip ilusilersorneqarnerani maleruagassat pisariittuunerisa allaffissornikkullu aqukkuminarnerisa attatiinnarnissaat pingaartinneqarpoq.

Allanguutissatut siunnersuut malillugu pisinermit akigititat, suliffeqarfiup atorunnaarsinnissaa pillugu aalajangiinerup tamanut saqqummiunneqarnissaa sioqqullugu ukiunit 3-nit sivikinnerusumi pisimasut, akileraartarnermut ingerlatsiviup isiginiassanngilai. Pisisup (matuma siuliani assersuummi B) ulloq taanna sioqqullugu ukiut 3-t iluanni ingerlatseqatigiiffimmi aningaasaatinit piginneqataassutit tigusimappagit, pisisoq pisinermit akigititamut ilanngaaserneqassanngilaq. Taamaattumik pisisoq suliffeqarfiup atorunnaarsinnerani iluanaarutitut tamaginnut akileraaruserneqassaaq, taamaattumik taamatut nuussinerit iluaqutissartaqartussaanaatik.

Suliffeqarfiup atorunnaarsinnerani akileraarummik sipaarnissamik iluanaarniapilunermik eqqarsaateqarnerit pakkersimaarnissaannut ukiut 3-t naammattut naliliisoqarpoq. Paarlattuanik piffissamut killigititap ingerlatseqatigiiffinni niuernerit piviusut pinngitsoortissagai naatsorsuutigineqanngilaq, tassami ingerlatsinerup ingerlaannarnissaa siunertaralugu ingerlatseqatigiiffiup pisiarineqarnera sivisunerusumik ingerlanneqartarmat.

Pisortanit ikiorsiissutit pillugit § 72-ip atorunnaarsinneqarnera

§ 72 pisariaqartitsinermik naliliilluni pisortanit ikiorsiissutit, pisortanit ikiorsiissutit pillugit Inatsisartut peqqussutaat nr. 15, 20. november 2006-imeersoq atuuttoq malillugu tunniunneqartartut, akileraarutitigut suliarineqartarnerannut tunngassuteqarpoq.

Inatsit taanna ulloq 1. januar 2023, pisortanit ikiorsiissutit pillugit Inatsisartut inatsisaata nr. 6, 20. juni 2022-meersup atuutilernerani, atorunnaarsinneqartussaagaluarpoq. Taamaattoq Inatsisartut inatsisaata nutaap taassuma atuutilerfissaata 2023-mi pisussanngorlugu kinguartinneqarnissaa kommuninut oqaloqatigiissutigineqarsimavoq. Taamaattumik siunnersuutigineqarpoq Naalakkersuisut § 72-ip atorunnaarsinnissaanut piginnaatinneqassasut, taamaalilluni tamanna piffissamut atuutilerfissaanut nutaamut ataqatigiissaarneqarsinnaassalluni.

Allannguutissatut siunnersuutip aningaasaqarnikkut sunniuteqarnissaa*Suliffeqarfimmik atorunnaarsitsinermi pissarsiat akileraaruserneqarnissaasa avaqqutaarneqarnera*

Allannguutissatut siunnersuutip iluanaarutitigut sunniutissai naatsorsuutigineqartut suussanersut nalilerneqarsinnaanngillat, tassami allannguummi taamaallaat avaqqutaarisinnaanerup pitsaaliornissaa siunertarineqarmat.

2021-mi ingerlatseqatigiiffinnik akiliisinnaasunik atorunnaarsitsinerit 30-t ingerlanneqarput, aammalu ukiumoortumik naatsorsuutini kingullermik tamanut saqqummiunneqartumi nammineq aningaasaatinut uuttorlugu, atorunnaarsitsinermi iluanaarutit ataatsimut katillugit 35 mio. koruunit missaanniillutik.

Taamaattoq siunissami iluanaarutit qanoq annertutigissanersut oqaluttuarisaanermi kisitsisit aallaavigalugit missiliorneqarsinnaanngilaq, tassami aningaasaatini piginneqataassutitut pisinermi akigitit ilisimaneqanngimmata, aammalu siunissami atorunnaarsitsinerit annertussusissaat ilisimaneqanngimmat. Kiisalu siunnersuut aningaasaatinik piginnettut pissusilersortarneranni allangortitsinernik malitseqarsinnaavoq.

Pisortanit ikiorsiissutit pillugit § 72-ip atorunnaarsinneqarnera

Siunnersuut taamaallaat sunniutaasunut allannguutaavoq, pisortanit ikiorsiissutitut inatsisip nutaap atuutilernissaata kinguartinneqarsinnaanerata malitsigisaanik.

Allannguutissatut siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

Allannguutissatut siunnersuut siunnersuummi § 1, nr. 6-imut tunngassuteqarpoq, taamaaliornermi § 86 a nutaaq ilanngunneqarluni.

Allannguutissatut siunnersuummi imm. 3 siunnersuutigineqartoq nutaajuvoq.

Aalajangersagaq malillugu aningaasaatini piginneqataassutitut pisinermi akigititat, aningaasaatinik piginnittup suliffeqarfiup atorunnaarsinnissaa pillugu ataatsimeersuarnermi aalajangiinerup tamanut saqqummiunneqarnissaa sioqqullugu ukiunit 3-nit sivikinnerusumi pissarsiarisimasai, isiginiarneqassangillat. Kalaallit imaluunniit danskit ingerlatseqatigiiffiat pineqarsimappat, suliffeqarfiup atorunnaarsinnissaa pillugu ataatsimeersuarnermi aalajangiineq Erhvervsstyrelsen-imut nalunaarutigineqartussaavoq aammalu Det Centrale Virksomhedsregisterimi tamanut saqqummiunneqartussaalluni.

Suliffeqarfiup atorunnaarsinnissaa pillugu aalajangiineq pisut ilaanni ingerlatseqatigiiffinnut inatsimmi maleruagassat malillugit pinngitsaaliissummik atorunnaarsitsinertut Erhvervsstyrelsen-imit aallartinneqarsinnaavoq, taamatullu ingerlatseqatigiiffiit akiliinermut nalunaarummi atorunnaarsinneqarsinnaallutik. Ingerlatseqatigiiffinnik nunani allani angerlarsimaffilinnik atorunnaarsitsinermi ingerlatseqatigiiffinnik akiliisinnaasunik atorunnaarsitsinermut maleruagassat allaasinnaapput. Aalajangiineq taamatut tamanut ammasumik saqqummiunneqarsimanani pisimappat, ulloq ingerlatseqatigiiffiup atorunnaarsinnialernera imaluunniit atuukkunnaarsinnialernera pingaartinneqartariaqarpoq.

Assersuut: Akileraartussaataasup, A-p, ulloq 15. juni 2020 aktiaatileqatigiiffimmi aktiaatit 50 procentii 200.000 koruunilerlugit pisiarai, aammalu ulloq 15. juli 2020 aktiaatit 50 procentiisa sinneri 800.000 koruunilerlugit A-p pisiaralugit.

Ulloq 1. juli 2023 ingerlatseqatigiiffiup atorunnaarsinneqarnissaa pillugu aalajangiineq Det Centrale Virksomhedsregisterimi tamanut saqqummiunneqarpoq. A tamatuma kingorna pisinermut akigititamut 200.000-nik ilanngaaserneqassaaq, kisianni pisinermi akigititap sinneranut 800.000 koruuninik ilanngaaserneqassanani, tassami pisinermut piffissaq aalajangiinerup tamanut ammasumik saqqummiunneqarnissaa sioqqullugu ukiunit 3-nit sivikinnerusumiimmat.

§ 2-mut

Nr. 1-imut

Imm. 3-p ilanngunneqarnerani siunnersuutigineqarpoq § 72-ip atorunnaarsinnissaanut Naalakkersuisut piginnaatinneqassasut.